

Prof. dr. Zdravko Lučić
Univerzitet u Sarajevu / University of Sarajevo
Pravni fakultet / Faculty of Law

IN MEMORIAM

Prof. dr. VERA ČUČKOVIĆ
(1. 11. 1933 - 27. 7. 2017.)

U Beogradu 27. 7. 2017. godine ovaj svijet je u 84. godini života napustila prof. dr. Vera Čučković, koja je veliki dio radnog vijeka bila član kolektiva Pravnog fakulteta Univerziteta u Sarajevu kao cijenjeni redovni profesor *Rimskog prava*. Mnogim generacijama studenata, saradnika i profesorskog kolegija naše kuće ostat će u prijatnom sjećanju lik ove heroine temeljitog pravničkog odgojitelja i pedagoga. Zračila je profesorskim autoritetom, uz posjedovanje istinske ljudske komunikativnosti sa predstavnicima svih slojeva odgojnog procesa mladih pravnika u našem društvu. Nesebično je prenosila svoja dubinska znanja fenomena rimske pravne tradicije svima onima koji su pokazivali interes za suštinske odrednice pravnih korijena, a naročito prema svojim najbližim saradnicima asistentima.

Prof. dr. Vera Čučković rođena je 1. novembra 1933. godine u Prijedoru. Srednju ekonomsku školu je završila 1951. godine u Banjoj Luci. Diplomirala je 1958. godine na Pravnom fakultetu u Sarajevu. Svoj radni angažman na Pravnom fakultetu u Sarajevu započela je 17. 11. 1958. godine kao asistent na *Rimskom pravu* kod prvog profesora ovog predmeta u Bosni i Hercegovini prof. dr. Miloša Bajića, studenta i doktoranta na Sorboni u Parizu. Imala je priliku kroz dugogodišnju saradnju sa ovim bardom južnoslavenske romanistike postići čvrste metodološke znanstvene i pedagoške kvalitete. Doktorirala je na Pravnom fakultetu Univerziteta u Beogradu 1965. godine disertacijom „Razvoj dubrovačkog nasljednog prava do 1358. godine“, pri čijoj je izradi za mentora imala prof. dr. Jelenu Danilović, profesoricu koja je izvela na put najveći broj romanista na tadašnjim univerzitetima ovih prostora. Profesorica Danilović je na osnovu svojih velikih internacionalnih naučnih komunikacija sa romanistima iz cijelog svijeta otvorila te puteve i za profesoricu Veru, omogućavajući joj studijske boravke kod najvećeg svjetskog romaniste Maksa Kazera u Hamburgu.

Tokom cjelokupnog svog radnog vijeka prof. dr. Vera Čučković je ostavila neizbrisivi trag u našoj i međunarodnoj romanistici. Široka je lepeza najraznovrsnijih romanističkih tema kojima je posvećivala svoju akribičnu znanstvenu znatiželju. Njeni naučni radovi problematiziraju pitanja rimskih kondicija, instituta *In iure cessio hereditatis*, *In iure cessio tutelae* i *In iure cessio ususfructus*, konzorcijuma kao oblika agnatske porodice kao i osnova ekonomsko-društvene i političke historije rimske države. Pored ovih čisto dogmatskih romanističkih pitanja profesorica Čučković je najveći dio svog stvaralačkog opusa posvetila izučavanju i pionirskom istraživanju srednjevjekovnog privatnog prava u Dubrovniku u svjetlu aktuelnosti pitanja recepcije rimskog prava. Ova istraživanja su dobila sveopću pozitivnu ocjenu naučne javnosti kao najbolji primjer arhivističke akribije. Na veliki zapaženi uticaj njenih istraživanja o pitanjima materijalnog obezbjeđenja supružnika u dubrovačkom srednjevjekovnom pravu, Bogišićevim pogledima na porodično pravo u dubrovačkom Statutu, epitropima starog dubrovačkog prava, odredbi Dubrovačkog statuta *de concordio inter virum et uxorem schepatos*, porodici i porodičnim odnosima u srednjevjekovnom Dubrovniku, razvoju ugovora o nasljeđivanju u dubrovačkom pravu XIV vijeka, ulozi i značaju porote i drugih značajnih procesno-pravnih instituta sudske prakse dubrovačkih sudova ukazuje činjenica velike citiranosti njenih naučnih radova u referentnoj literaturi modernih istraživača slične ili srodne problematike.

Značajan dio stvaralačkog opusa prof. dr. Vera Čučković je posvetila i pitanjima srednjevjekovnog bosanskog prava. Ona je bila jedan od prvih nosilaca naučnoistraživačkog projekta multidisciplinarnog karaktera na Pravnom fakultetu u Sarajevu sa radnim naslovom „Razvoj privatnog prava feudalne Bosne“. Svojim angažmanom na ovom projektu je pokazala svu težinu rada historičara koji na minimalnim izvorima historijske građe uspijeva naučnoj javnosti pružiti pregled osnovnih kategorija srednjevjekovnog prava, posebno segmenta običajnog prava. Kroz ovaj rad je autorica odgovorila zadatku modernog romaniste, da – osvjetljavajući pojedine faze procesa recepcije rimskog prava – rasvijetli podlogu pravima evropskog kontinentalnog sistema. Temeljnim historijskim istraživanjem je otvarala perspektive za komparativnu komponentu poimanja konkretnih pravnih instituta. Veliku pažnju su pobudili njeni radovi o pitanjima krvne osvete u srednjevjekovnom bosanskom pravu.

Prof. dr. Vera Čučković je bila čovjek Fakulteta. Njena posvećenost nastavnim obavezama, predavanjima, konsultacijama i ispitima je bila primjer univerzitetske tačnosti i dosljednosti. Zbog svoje izuzetne objektivnosti prilikom ispitivanja profesorica Vera je uživala nesebičan

autoritet kod studenata. Veliki doprinos je dala u podizanju naučnog podmlatka na matičnom fakultetu u Sarajevu kao i njegovim odjeljenjima u Mostaru, Banjoj Luci, Zenici i Doboju. Uvijek je davala svoj nesebični doprinos razvoju Fakulteta kroz aktivno članstvo u njegovim organima kao što su Savjet, Redakcija Godišnjaka, šef odjeljenja fakulteta u Zenici, te kao rukovodilac Katedre za historiju države i prava. Reprezentativno je predstavljala našu instituciju u univerzitetskim i širim društvenim domenima. Na Pravnom fakultetu u Sarajevu je bila angažirana do 1. 7. 1993. godine nakon čega usljed ratnih dešavanja prelazi na Pravni fakultet u Beogradu sa kojeg je 2001. godine otišla u mirovinu.

Kao njen dugogodišnji asistent bio sam u prilici učiti i raditi sa pedagogom kojeg je krasila ljudska toplina, dobrotu, strpljivost i puna nesebičnost u pružanju svake pomoći čovjeku na njegovim prvim najtežim naučnim koracima. Djelo i lik prof. dr. Vere Čučković ostat će duboko utkani u historiju južnoslavenske romanistike. Draga profesorice, živjet ćeš vječno u našim sjećanjima i nikada nećeš biti zaboravljena. Veliko hvala!